

eine / zwei oder drey gerade Linien zu beide seitten / nach demnem  
wolgefahen / als zusehen D E. D F. D G.

Zum dritten nimme für dich die erste Taffel / so hernach  
folgt / darinn die Abtheilung einer geraden Lini nach ge-  
gebener proportio zuffinden ist / vnd sihe zur linckē hand / am ennsers-  
sten Rand / in der ersten columna, vnder dem Buchstaben A.  
neben den Ziffern / so der natürlichen Ordnung 1. 2. 3. 4. 5. 22.  
einander nachgehen / was für Zahlen zur rechten Hand vnder  
dem B. stehn / welche du must in der Fundamentlini suchen / vnd  
auff derselbigen auff das Schregmaß vom centro D. in die Lini  
D E. tragen / also :

Der erste Punct hatt 1000. Darumb weil die Fundas-  
mentlini 1000. helt / so setze ich ein gleiche D E. vnd schreib in das  
E. zu beyden seitten 1.

Der ander Punct hat 500. diese 500 suche ich inn der  
Fundamentlini A B. also : Den einen Fuß des gemeinen Hands  
circels stell ich in das A. den andern streck ich inn die 500. behalt  
ihn also vnverruckt offen / vnd trag in auff die Lini D E. auß dem  
D. gegen dem E. auff beide seitten / vnd schreib darzu 2.

Also der dritte Punct hatt 333. Solche 333. suche ich  
in der Fundamentlini A B. stelle wider den einen Fuß des Cir-  
ckels in das A. den andern 333. behalte ihn also vnverruckt / vnd  
trag ihn im Schregmaß auß dem D. gegen dem E. auff die Lini  
D E. zu beiden seitten in das 3.

Vnd so fortan mit allen Puncten / biß die Lini D E.  
in ihre theil / auß der ersten Taffel abgetheilet / schreib darzu : Re-  
cta lineæ divisio, oder / Abtheilung einer geraden Lini.

Wie du mit der ersten Taffeln / vnd Linea Recta, oder  
geraden Lini / als D E. gehandelt : also vnd nicht anderst / soltu  
mit den lineis circularib<sup>9</sup> auß der andern / linea Graduum auß  
der dritten / linea Geometrica auß der vierten / 22. procedirn :  
vnd